

BISIK-BISIK

AWANG menyokong penuh hasrat Universiti Putra Malaysia (UPM) untuk mengembalikan kegemilangannya dalam bidang pertanian.

Malah, bagi Awang, ia patut kekal sebagai sebuah universiti yang memberi pengkhususan terhadap pertanian.

Awang tidak tahu apa sebabnya Universiti Pertanian Malaysia ditukar menjadi Universiti Putra Malaysia. Barangkali pertanian sudah bukan satu keutamaan atau sudah menjadi lekeh, tiada glamor.

Sungguhpun pengajian pertanian masih ditawarkan di universiti itu sekarang, banyak kursus baru ditawarkan. Antaranya pengajian media. Awang tidak mengerti kenapa hampir kesemua universiti di Malaysia menawarkan pengajian ini sedangkan pasarannya bukanlah besar sangat. Universiti yang sepatutnya mengajar pertanian pun hendak ajar hal media.

Awang khuatir, lama-kelamaan, pengajian pertanian akan pupus dan tidak lagi menjadi keutamaan. Sebelum ini berlaku, eloklah diperkasakan semula pengajian pertanian, sejajar dengan keutamaan yang kerajaan sendiri berikan.

Dan Awang ingin mencadangkan supaya ia kembali menjadi Universiti Pertanian Malaysia.

Awang – Harap timbang.

Awang Selamat